

Kaiwo Anatu Na Yakobusi

Kaiwo dedung we Yakobusi

Kaiwo anatu ne Yakobusi soi denatuai we Allai ne inontarai eroaso Yesusio enayai wariai na nunei sentenang fosa. Na kaiwo anatu ne, soi kariri fi bitoya wesa na kaiwo netawea fo, we fiainawiai wesa tuti we deunausa nayai. Amani deunau kariri inontarai Kristenine eminohi toa fo tuti fianai aino enari fo. Ampafe soi wesa, kariri todoni mano ene fi fosa tuti mano ene pari fi fosa fianai aino esodaira fo, kariri todoni enari ne bengfe fo, enemituai sarawa kaha fo, kariri roasoai tuti ohong kaririai fo, kariri kaiwo ariri maduri foi, kariri awaifo, tuti kariri mano enemirorong dedai fosa. Yakobusi kontai deretawansa we wirottinggai inontarai fanai, wirotatofa fanai, tuti etawansa, tuti etutang tutisa we Allai.

Na kaiwo anatu nini Yakobusi deretawanai kontai paria we na eminohi weinontarai Kristeni fo, todoni kontaio eteinawi ene eroasofo na etohong toa fo.

Kaiwone deto kutuai toninai:

1:1 Kaiwo reantenang.

1:2-8 Roasoia mutu na dadira rorong fo tuti utang Sempaisi we dohong awaifo.

1:9-11 Fi kariri mano ene fi fosa tuti mano ene pari fi fosa fianai aino esodaira fo.

1:12-18 Fi weanggari ambori tau wei fo.

1:19-27 Taramioai tuti ohong kaririai.

2:1-13 Wiroti iri inontarai kariri ene fifo fanai.

2:14-26 Roasoai tuti ohong kaririai.

3:1-18 Sasari tatapereminei wedayari.

4:1-5:6 Inontarai Kristeni tuti finunei.

5:7-20 Kaiwo arerai we ohong kaririai.

Mahikaifea

1 ¹Weo doroi bohio mea kiai, amani inontaraio mewaniria na Israeli rabuang suraya boruo menayai wariai na nunei sentenang wa mea. Yau Yakobusi, Allai tuti Seng Yesus Kristusi une womingne yau, yenatu mahikaifeai we mea kiai.

Meroasoia mutu na dadira rorong fo tuti metutang we Sempaisi we ambori dohong mea mesawai

²Doroi bohi, masino mesodai maino dadirafo mani, dohonao menemirorongwai fituaya fe, mae memararising pampang. ³Weo mewartawanaifa we meroasoia mutu na dadira rorong mesodairi nani, wedaya metawang mea. ⁴Meruraifa we ambori mene metawang mea nanai wedaya memasi tuti mebiru na fiani kontai. ⁵Masino manei na mea wiroweai kaha mani, todoni kontai dutang Allai ambori dohong awaifo wei, weo Allai mani warang takahetuai funomai ampafe fianai aino utang wea fo dohonai arora, wiroweai enetituitafea kaha. ⁶Wape manei dutani mani, yoasoai we fi dutang weai nanai sobua rai, wiroweai enerorong soriru fanai. Weo mano enerorong soriru nei mani, ne tarai toyari andeisa rawanangrausi. Wanangfoi siai todoni mani, andeisafoi dipu kontai tonanai. ⁷⁻⁸Inontarai tonana nei mani enerorong boyari kaha, ampafe wiroweai meduraia futuayai kariri fianai aino niari fo kaha. Nana mani dohonao enetituitai kontai we sobu fieai ria Sempaisi fe.

Fi kariri mano ene pari fi fosa tuti mano ene fi fosa

⁹Doroi Kristeni mano mene pari fi wa mea, meparaise, we Allai yuai mea ampa. ¹⁰Tuti inontarai mene fi wa mea, memararising kontai, weo Allai dohong mea meminohi na katai tawawa fo. Weo inontarai ene fi fosa ambori eworu toyari ainari rai. ¹¹Wofi dautai piao robongfoi mani, reraungfoi siamorang, ampafe ainarifo mirurang tuti ne mianafa nai. Tonanai kontai we inontarai ene fi fosa. Erurai tuti ene fifoa tonanai, wape ambori eworu.

Fi weanggariri tata we ambori tatawai

¹²Mandoni dino sawani na fi dadira sodaira fo mani, wenani Allai mioani. Weo sawani kawuru na ne tonananea mani ambori sobu fiembaitafo, amani sobu numainu Seng Allai dereri we inontarai mano enemiwawuti fosa fo.

¹³Manei sobu fio weanggariri we ambori dohong sarawaifa fo mani, dohonao deyo, "Allai dino weanggariri yau ne," fe. Weo Allai mani wiroweai enerorong dohong we niari fi karira fea kaha, tuti wiroweai manei na wea kaha. ¹⁴Mae manei sobu fi weanggariri tonana fea mani,

enerorong dohong we niari fi kerira fo andi wedayari ne, ne tarai kariri keri sofa we diang. ¹⁵Ampafe dohong kariri enerorong kerira nania mani, wedaya sasarifoitu tuti weboyari ria sasarifoitu pampang mani, ambori wedaya mararehafoi.

¹⁶Doroi enehuwawu mea wa meaine, dohonao menemitituai sarawa fe, weo Allai wiroweangari manei kaha. ¹⁷Fiani kontai aino tasobua fo, amani fi bengfo tuti maifo, biari kiai na rorafaisi meu, amani na Allai, mano niari sambewarai na rorafaisi foi. I mani Allai, mano wirowiwanina na wea kaha, tuti fianai aino meduraia fo wirowiwanina ahang kaha. ¹⁸Na mantauni ne dawiafo, yuai tata we ne arikang tuti yiwang taenemirongnei weworu, amani na taroaso ne Kaiwo wetarai fo. Niari tonanai we tatafo, weo nano fi kiai niariri na nufi nini mani, tataino diri tata reantenangne.

Taramioai tuti ohong kaririai

¹⁹Doroi enehuwawu mea wa meaine, meru kaiwo fininaia mutu, amani we mandoni wau kontai ki, wukahera we taramudidau kaiwoariri, wape dohonao wukahera we modu tuti kosou fanai. ²⁰Weo mandoni dino kesou mani wirowehong kariri ne maio Allai eneofo kaha. ²¹Ampafe fi kerira tuti fi memunao menariri pampang foi mani, mehabioi weru mea. Mae na menemirorong tewawa meru Allai ne Kaiwo sanamai na menemirongwai, weo Kaiwo nanai wemambiriu we kia mea mekaharai weru ne karirafo.

²²Todoni kontai metohong kariri fianai aino Allai medura fo, dohonao metaramioai tera fe. Weo metaramioai wape metohong kariria kaha mani, mepampamu bera mantaung mea aha. ²³Inontarai mano tarao Allai ne Kaiwofo wape wirowehong kariria kaha foi mani, ne tarai toyari wedoari deti ureng na kasinai. ²⁴Deti urengfo na maia kai, wape da weru kasinaifoia mani aroporo urengfo we ne tarai toa foa. ²⁵Wape Allai ne Hukumio kia kaiwasafui weru mamantitiorong foi fo, manei detori na mai tuti dohong kaririaifa pampang, wirowetaraofai terai mae aroporohai ahang kaha, wenani Allai mioani na fianai aino niari fo.

²⁶Mandoni dino deyo i mani inontarai somi we Sempaisi dine, wape wiroweitawang taperengfoi kaha mani, wenani sofa berahi aha tuti ne yoasofo wirowefiea kaha. ²⁷Inontarai somi na tarai we Dai Allai tuti mesi na urengreafo ne mani, fiata arikang awata tuti wiwina esodai dadira fosa, tuti i kontai derara ne taraifoi weru fi kerira nunei.

Dohonao metiri inontarai kariri ene fifofe

2 ¹Doroi meaine, mea mani inontarai meroaso Yesus Kristusi tane Sengno sambewarai dadai sewa foi, di mea, tonana mani wirowemetiri inontarai toyari manei dadai sewai manei siai fanai. ²Weo masino inontarai ne ra bitoya

manei, sata araha rea keiwewa na warakehafoi tuti sensuni na ansungno mehikai, da to mene katai mefanduhi mea nai wai mau, mayeai inontarai ne pari fi manei, sensuni na ansung karira, da kontai mau, ³nana mani mano ne ra bitoya tuti sensuni na ansung mehikai foi andino metatori sewa ne. Weo memadu wei meteyo, “Daie, munohi na kadera denteng nini,” wape mano ne pari fi foi mani memadu wei meteyo, “Boari na wanai ete munohi na nang wowong nina.” ⁴Menari tonana mani, metitua mene doroifosa, we manea etadai sewa mano wei fosa, tuti deinawiai we menemititaitawa kerira.

⁵Nehu doro i enehuwawu mea wa meaine, metarami ma. Inontarai ene pari fi na nuneisa mani, Allai dirisa we ambori titua kariri ene eroasofo mani, sahusa we inontarai ene fi disa. Inontarai nanisa ambori Allai yuaise we ne inontarai terai weo eminohi riati na ne weMananufu, kariri ne kaiwo dererai we mano enemiwawutia fosa. ⁶Manamo metoari aha meteikanggani mano ene pari fi fosa aha. Wape mano ene ra bitoya fosa enari kanggani mea. Ansaino etinggai mea tuti eha mea to mangkutu kaiwo fosa ne. ⁷Eaino eteibera wonongno dedai mirarebana foi, amani Yesusi mano ne mea foi.

⁸Mananufaisi dohong kaiwoariri we tatohong kaririai na Buku Mirarebana foi, amani,

“Menemiwawu inontarai siai kariri menemiwawu bera mantaung mea wa.”^a

Metohong kariri kaiwo nana mani menari ne wetaraifo finana. ⁹Mae metiri inontarai toyari manei dedai sewa manei siai, amani metato manea wape manea bereri, nana mani metohong sasari, tuti Allai ne Hukumi dohonai we Musai nanai deinawiai we metohong sara ne Hukumifoi. ¹⁰Tuti mandoni dino dohong kariri Allai ne Hukumifoi kiai, wape enefunomi na rabuang bei mani, wenani dohong sara Hukumifoi sentenang kontai. ¹¹Weo na Hukumifoi Allai medu deyo,

“Wiro metena ria wiwing ete mang siai fanai,”

tuti Hukumi siari nani kontai andino deyo,

“Wiro memung inontarai fanai.”^b

Ampafe masino wirowi metena ria wiwing siai kaha, wape memung inontarai mani, metohong sara ne Hukumifoi sentenang kontai.

¹²Ampafe fianai aino memadura fo tuti menari fo, metitua weai. Weo Allai kiutu kaiwo kariri mea rai, kariri ne Kaiwo kia kaiwasafu weru mamantiti rorong foi fo. ¹³Weo mandoni dino wirowi deinawi ne arofo we inontarai siai kaha mani, na rahida wanai Allai kontai deinawi ne arofo wei kaha. Wape mandoni dino aro inontarai siai mani Allai wirowi dohong aibofo wei kaha.

Roasoai tuti ohong kaririai

¹⁴Nehu doro i meaine, manei medu deyo i mani inontarai yoasoa dine, wape wirowi deinawi kaririai na ne dohong toa fo kaha, nana mani ne

^a 2:8 Imamati 19:18 ^b 2:11 Keluaran 20:14; Ulangan 5:18

yoasofo kia fiani wei rai? Manei yoasoai tonana mani Allai wirow feriri kaha.

¹⁵Tarahio mene doroi manei, ne pari ansung demoyarai we sensuni nayai tuti fiang demoyarai we dang na rahida neungfo kaha. ¹⁶Wape memadu wei meteyo, “Wau ro mau wa. Nemu mahikai wonsung waua monikapoi feai tuti mahikai bampi fea.” Wape wirow metohong fi dohong weai nana kaha, nana mani we fiani e memadu tonanai wei nina? ¹⁷Tonanai kontai na taroasofo, wirow tatohong kariria kaha mani, tane taroasoai nanai wefiea kaha kontai.

¹⁸Tarahio manei boyo, “Yau mani, iroasoai teraifa mani demoyarai,” tuti manei wau aha mani boyo, “Yau mani, yohong te ne bengfoa mani demoyarai.” Wape imadu mau yeyo, meteinawiai na kaiwoariri arora kariri mene meroasoawa, ambori yeinawi nehu iroasoane na yohong toa ne we mea. ¹⁹Kontai meroasoai we Allai mansiari kawuru. Mahikai! Wape metarami ma, inggiranesa eroasoai tonanai kontai, tuti ematai paria. Mano meroasoai wape wirow metohong beng kaha mani, mebung sewa inggirafosa kaha, weo ea eroasoai kontai, wape etohong kariria kaha.

²⁰Inontarai inggowui wa meaine, tarahio meteyo yeinawiaifa we mea we mewati terai weo roasoaifa wape ohong kariri ne bengfo kaha mani, roasoai tonana nei wefiea kahai. ²¹Mewati tane werengno Abrahami e? Rahida bo deo miung ne kaisungno Isaki na mesba wowongfo kariri kaiwo arerai Allai deyoai wei fo, na fi niari nanai Allai detori we denteng riati aha. ²²Na fianai aino Abrahami niari nanai, deinawiaia kasau ampa, we roasofo mani, wirow kaiwo madurai arora fine kaha, mae fio ohong kariria fine. Ampefe na finiarifo mani ne yoasofo mai. ²³Finanai mai kariri Sengnei ne Kaiwo rabuang bo dotu deyo,

“Abrahami yoaso Allai,

tuti na yoasoai nanai Allai detori we inontarai mesi dine.”^c Ampafe sahui we ne maniwowiri. ²⁴Ampafe kasau ampa, we inontarainesa ebeng ria Allai aha fo, wirow na eroasoai tera fo kaha, mae na fi bengno enari fo.

²⁵Kontai mewati Rahapi e? I wiwing diru dine, wape Allai detori we denteng riati, we fianai aino niari fo, amani inontarai Israeli manduo ura wa uwati kariri bendari Yeriho foi, Rahapi dino dediwa suru na ne munufoi, tuti fiata suru uwawu to katai siai aha fo. ²⁶Ampafe, kariri tane tarainei weo anseng bireri weia mani, mireha. Tonanai kontai we taroasofo, wirow tatohong kaririai na fibeng tanari fo kaha mani, taroasoai nanai ne tarai toyari mireha, wirow wefiea kaha.

^c 2:23 Kejadian 15:6

Sasari tatapereminei wedayari

3 ¹Doroi meaine, dohonao na mea bitoya merurai we mewemantaunau jemati fe. Weo mewaitawanaifa we mano tawemantaunaune tata mani, Allai kiutu kaiwo we tata fo maraba sewa.

²Tata kiai, wea mani tatohong sarawai. Wape mano wirow medu sara kaiwoariri kaha foi, i mani inontarai mesi dine, amani inontaraio sawang ne tarai foia mitu dine. ³Mewati kudanei e, oyo autai nai tuti ambori iruwi we da kariri tatawiafo mani, tabuhi wai na borongfoi ambori wai nani dino iruwi nai we da kariri tatawiafo ne. ⁴Kaparinei kontai tonanai. Kaparifo watioi we fiebai tonanai tuti wanangfei mani suruoi paria, wape na ne bo irua foi mano siruwi foi siruwi defai na mimoya kariri ne dawiafo. ⁵Tonanai kontai we tatapereminei, i ketui paria wape deparanding tata karira beyari. Mewati adia urengnei, ketui tonanai ki wape enang dinio kesoia kiai nai. ⁶Tatapereminei mani ne tarai kariri adia. I wedaya sasari we tane tarainei sentenang. Fi na tane tarainei kiai mani andino kerira sewa ne. Ampafe kaiwo tamadurai na tatapereminei, ne tarai kariri adia na Soroaorong foi. Saminseni andi wedaya tatapereminei denggararu tonanai, ambori kia karira we tata na rahida taminohi na nunei ninai.

⁷Andowa aweng boa foi tuti ne fiafa na arong foi, romu tuti diangnei, aunauwi wori finahang ki, tuti inontaraine etaunauwia finahang ampa. ⁸Wape tatapereminei mani mandoni kontaio wemambiriu we deunauwia finahang we medu sua kaiwo kaha. I memuna, mandoni kontaio wirow taraoi kaha, ne tarai toyari fimemu we memu kaiwasanei. ⁹Tamadu nai tatohong mahikai we Sempaisi, tane Dai Allai, tuti tataperemi siari nani kontai andino takaherawai tuti tateikanggani inontarai siai Allai niarisa kariri mantaunifo ne. ¹⁰Ampafe kaiwo fiafo tuti kaiwo kaherawa fo kawariai ruhiai na tatapereminei. Doroi meaine, finanai kerira paria. ¹¹Weo waya ureng boyari deda mandiei mani, wirow dowe memisi tuti dowe pirandima kaha. ¹²Tonana kontai we ai urung nei, wirow webong saituni kaha, tuti anggurinei wirow webong urung kaha. Ampafe waya ureng deda mandiei meuai foi, wirow dedao mereha memisi ahang kaha.

Awai kia mai we tata ne mani biari na Allai meu

¹³Masino na mea manei deyo i mani sewai tuti deitawang Allai ne rangfoi, nana mani todoni kontaio deinawiaifa na dohong toa fo, amani niari fi masi fo tuti ne bengfo na enerorong tewawao weneung na ne awaifo. ¹⁴Wape masino menemirorong pirahai we inontarai siai tuti mewati we mene tarai bo meneng wai terai we ambori mewemewonomi mani, dohonao meboi mearomiwa meteyo mesawai fe. Weo na tonanane mebari wera kaiwo wetarai fo. ¹⁵Mano deyo sewai tonana nei mani, wirow

sobu awai nani na rorafaisi meu kaha, mae na nunei ma, tuti awai nani da na Allai Nuaninufai kaha, mae da na Saminseni ma. ¹⁶Weo na doni kontai inontarai enemirorong pirahai wesa tuti ewati wesa terai esera we ambori ewewonomi, na nanai kontai ambori inontarai esawasa tuti emamuna wawerasa, tuti enari maino fi karira fo.

¹⁷Wape mandoni dino sobu awai na rorafaisi meu mani, reantenang pari mani wenani mesi wirowi seyewa kaha, piraise we kia manangfo, deti we inontarai siai, tuti taradidau kaiwo. Enewawu fuba tuti niari ne bengfo. Doa rahanai, wirowi enetituai we manei dedai sewa manei siai kaha, tuti wirowi tapereng sobaura kaha. ¹⁸Inontaraio eminohi na mai tuti efata inontarai siai we eminohi ruhiai na mai, nana mani inontarai emasi disa, tuti etohong kariri Allai ne dawiafo.

Mewemaniwowiri we finunei fanai mae metato Allai

4 ¹Fifiani wedaya mea mesawa mea tuti memamuna wawera mea ne? Finanai dariai na fi karira menemituaiti na menemirorongwai, amani finanai dawi mea pampang we menari ne karirafo. ²Metohong paria we mesobu fieai, wape finanai mesobua kaha, wedaya memung wawera mea. Tuti menemititou we inontarai ene fi na menemirorong kerira, wape wirowi mesobu fi metawi weai nana kaha. Mesawa mea tuti memamuna wawera mea. Mesobu fi metawi wea fo kaha, weo metutang Allai kaha fefe. ³Kontai tarahio metutani kawuru ampa, wape mesobua kaha, weo fio metutang weai nanai, wirowi na menemirorong mesi kaha, wape we mantaung mea mefaraiseraifa fine.

⁴Toyari wiwingno enerorong wirowi dohong we ne mangfoi titou ahang kaha tuti dohong sarawai ria mang siai, mea kontai menemirorong dohong te we Allai ahang kaha, mae metohong we finunei. Mewaitawanai kahai we mewemaniwowiri we finunei mani, wedaya mewaiteta we Allaifo ne? Ampafe mandoni dino de wemaniwowiri we finunei mani, wenani waiteta we Allai kontai. ⁵Dohonao meteyo kaiwo dotu na Sengnei ne Kaiwone sofa fe. Weo Nuaninu Denteng Allai dohoni niayai na tane tarainei dawiai paria we tenemiwawu te Allai tuti tasomi terai wei. ⁶Tonanai ki wape Allai dohong beng fuba sewa we tata. Ampafe doni na Kaiwo Mahikai ne medurai deyo,

“Allai dapa mano enemirorong dedai nesa,
mae dohong beng we mano enemirorong tewawa nesa.”^d

⁷Ampafe tonana mani metato Allai tuti metapa Saminseni, ambori mito weru mea ki. ⁸Mehefang Allai, ambori Allai kontaio kefang mea. Mano menari sasari wa mea, meruai mewaramiwara mararebanai weru sasari menariri wai, tuti mano menemirorong boru wa mea mani meruai

^d 4:6 Amsali 3:34

menemirorongwai kontai ambori mirarebanai. ⁹Metatua bera mene taraiwai, mesai tuti metaidu, todoni kontai meriwang memiriwa na mesai tuti memirisingwa na menemirorong fituayai. ¹⁰Metu menemirorongwaia tewawa na Sempaaisi arongreafo, ambori yuai mea metadai ki.

Wiro meteibera mene doroifosa fanai

¹¹Doroi meaine, wiro meteibabera mea fanai. Mandoni dino deibera ne doroifofo ete dei we i we dohong sarawai, nana mani ne tarai toyari wenani deibera Allai ne Hukuminei tuti deyo Hukuminei sarawai, weo Hukumi nani deyo todoni kontai enewawu ne doroifofo. Nana mani mene tarai wemangkutu kaiwo we Allai ne Hukumifofo, toyari meteyo fibeng kaha fine. Masino meteibera Allai ne Hukuminei tonana mani, wiro metohong kariri Hukumifofo kaha. ¹²Wape mansiari kawuru andino ne mambiriu we dohong Hukumifi we inontaraine tatane, tuti andino wemangkutu kaiwo we tatane. Mano nani mani Allai dine, andino wemambiriu we feriri tata tuti kebi tata to Soroha rorong foi ne. Ampefe mene mambiriu fiani feaifa ne, meteibera tuti mehutu kaiwo we mene doroifesa nina?

Dohonao mearomiporo Sengnei tuti meboi mearomi tuti fi menari wa fe

¹³Mano memadu meteyo, “Rahida nini ete aha te, ambori torontai to bendari bowani ete bei siai aha, tonayai defuina bei teai we towaworifi torawayanai, we tosera we doi nayai.” Metarami ma. ¹⁴Fifianai aino aha mesobua fo mewartawana kahai arorawa. Mene tarai todoni rai? Mene tarai toyario kawario kameai mani watioi tonana mae touraia mani niaia. ¹⁵Ampafe memadu tonina, “Masino Sengnei eneo mani, taminohi tatarang tuti tanari fio tate tanari fo.” ¹⁶Manamo wiro memadu tonana kaha, mae menemirorong dedai paria tuti meboi mearomiwa tuti fi menari fo. Kaiwo fuba meboi mearomiwa naya mani, kerira paria. ¹⁷Ampafe mandoni dino deitawanaifa we ne bengfo todoni kontai niari, wape wiro niari kariria kaha mani, inontarai nani dohong sasari finanai.

Kaiwo aunau we mano ene ra bitoya fosa

5 ¹Mano mene ra bitoya wa meaine, metaramio nehu kaiwo finina. Mesai metaidu fafong we dadira bitoya ambori mesodairi foi. ²Mene rafi misuhia kiai ampa. Tuti mene ansungfe kantantini kiutuwi kiai ampa. ³Mene ra emasi tuti peraki fi raima soi kiai ampa. Raima nani we fiainawiai kariri fianai aino mesodaira fo ki, amani todoni Allai kebi mea tono rawanang adia rorong fo ambori keso mene taraiwai kiai. Weo nunei ne rahida werea naya fe kefang ampa, wape mefanduhi ra bitoya terai. Ampefe mene rawai niai ki tuti mesodai karira bitoya ki. ⁴Mewati ma! Mano erufi we mea na mene romiwai ebibe esahu weo wiro

mebaisa kaha fefe. Esai tuti esahu we manei fiatasa, tuti erawamifui nani, mananu Seng Allai taraai ampa. ⁵Mefanduhi ra bitoya na nunei we mefaraiseri tuti memiang mene taraiwai nai. Nana mani mene tarai toyari sapio ahumia ne tarai fiabai we ambori ani. Mea kontaio tonana, amani na mene ra nani memainenang mea we mesobu ne karirafo. ⁶Mano etohong sarawa kaha fosa meru aiboiosa tuti memunsa, wape wirot enumiai mea kaha.

**Metawang mea na dadira rorong mesodaira fo weo
metamang we rahida Sengnei daraberahi nai ma fo**

⁷Ampafe doroi meaine, metamang tuti metawang mea pariao Sengnei daraberahi aha ma. Metawang mea kariri inontarai mandohong romi nei, i mani sanang aibong na romifo, mae na wemunudang mani sawani demang pariao we wemetang aha ambori fi sanang fo tifu na mai tuti wetarai. ⁸Mea kontai tonanai, metamang tuti metawang mea, metoaria mutu, weo Sengnei ne rahida daraberahi nai ma foi kefang ampa. ⁹Doroi mea, dohonao menemitituai ete meteibera mea fanai. Weo menari tonana mani Allai dohong aiboi we mea rai. Mearomiaaifa we Mangkutu Kaiwofi kefang we da ma ne, meinenang kawuru ampa.

¹⁰Doroi meaine, mearomio kariri Allai ne nabio fafongfa emadu na wonong fesara fo. Ea esodai dadirafo tonanai ki, wape etawansa. Ampafe menarisa we fiainawiai we metohong karirisa. ¹¹Tarai to, ea mani tatatosa paria, we etawansa fefe. Metaramio Ayupi kontai we sawani na dadira rorong sodairi foi ampa, tuti mewartawanai kontai kariri fianai aino sobuai ria Seng Allai fo ampa. Weo Sengnei mani aroa sewa tuti enerorong denteng.

¹²Doroi meaine, ne reantenang pari metohong kaririai konta mani, dohonao mefafora na finunei ete na fi rorafaisi fe, ete na fifiani konta fe. Mae fi meteyoai nanai antu mani meroa terai meteyo yo, mae antu kaha mani meroa meteyo bireri. Ambori Allai dohong aiboifo we mea fanai.

¹³Masino manei na mea sodai dadira mani, dutang we Allai, mae manei firaise mani wenani yohi fiai Allai. ¹⁴Manei na mea meninang mani sahu mano ewenunggamiei we jemati fosa, ambori etutang tutiri we Allai tuti episowi na maning na Sempaisi wonongfo. ¹⁵Masino eroasoai tarai mani, mano meninang nani ambori denteng ki, weo Sengnei waraira ne maninangfoi. Tuti niari sasari mani Sengnei waraira ne sararifo kontai ki. ¹⁶Ampafe mea kiai meteiai wawera mene sarariwai, tuti metutang tuti wawera mea ambori mebeng. Mano enemirorong mesi fosa mani, ene nadifo wemambiriu paria tuti Allai yoa wei rai. ¹⁷Mewati Eliai. I mani inontarai batang dine kariri tata, wape yoasoia mutu dutanai we ambori metang ming fanai, tuti metangfoi wirot ming kahai defuina botoru aburungfei kaririai. ¹⁸Mayeai dutang

Sempaisi nariai aha, ainanaya metangfoi miung aha, ampafe ninoi tuti fitantanangfoi tetifu aha.^e

¹⁹Nehu doro meaine, masino manei na mea wiwo da kariri Sengnei ne Kaiwo wetarai ne ahang kaha, mayeai mano yoasoa manei fiatarai daraberahi we Kristusi aha, ²⁰nana mani mearomio ninai, amani mandoni dino wedaya inontarai sasari manei daraberahi weru ne rang sarawa foi mani, wenani feriri inontaraifo weru marareha rorong fo tuti wedaya sasari bitoya niariri foi niai.

Mahikaifeai.

^e 5:17-18 1 Mananufosa 17-18